

四庫全書

集部

欽定四庫全書

幔亭集卷十

明 徐燾 撰

五言排律

登玉皇閣

傑閣開靈境，瑤壇接太空。  
層甍青嶂裡，飛檻白雲中。  
海上蓬萊島，人間太乙宮。  
六鰲峰逶迤，五虎勢巖嵒。  
漸與塵寰隔，還於帝座通。  
天都低日月，地軸隘華嵩。  
遠眺龍

臺古迴看雉堞雄堦生瑤草綠鑪伏大丹紅妙訣傳金  
母高旂捧玉童驂鸞逢子晉騎鹿揖韓終自識玄關妙  
因知道教崇九仙遺蹟在何必訪崆峒

初夏集王氏南園

南園開勝地結伴共盤桓曲徑依精舍疎鐘出戒壇山  
光低古堞樹色隱層巒弱柳垂青沼名花映畫欄浮屠  
高七級懸磴折千盤帆影雲中細蟬聲雨後殘侵衣松  
露濕夾座竹陰寒鈴鐸憑虛聽川原入望看明霞散林

際初月掛簷端嘯咏情方洽酣歌夜未闌此中足幽賞  
長願接清歡

游方廣巖登絕頂二十四韻

方廣華嚴地神州一洞天寺藏青嶂裡路遠白雲邊氣  
候晴兼雨峰巒斷復連樹枝多臃腫蘿磴自盤旋猿嘯  
聽經石龍生洗鉢泉水簾終古瀉鐘乳半空懸境出塵  
寰外巖開混沌前金身餘五百世界度三千淨室隣飛  
瀑沙彌種石田空門灰幾刼削壁字何年谷有羚羊險

山從鳥道緣地偏堪避世境寂可安禪貝葉飄香界曇  
花落法筵桑門同客饌石榻伴僧眠已得澄心訣渾忘  
俗累牽探奇情未已躋險興翩然披莽尋支徑捫蘿到  
上巔畏途尤巖嶭側足更迤邐于聲俱喘蹒跚膝在  
肩聳身摩斗柄迴睇盼雲烟遠水看如帶重岡小似拳  
祇疑天闕近還聽谷聲傳客有玄暉趣僧如支遁賢從  
茲尋覺路長此奉金仙

登石竹山

一徑費攀躋羣峰覺盡低千層環碧嶂百級掛丹梯  
峻天疑近林深路轉迷空中飛鳥絕樹杪亂猿啼跳浪  
山魑避盤旋羽客栖解衣穿草莽揮手挾虹霓歲久碑  
無字丹成竈有泥書符尋篆錄煉藥乞刀圭吟眺情俱  
適徘徊日漸西扶筇下山去月色印前谿

登萬歲塔

寶塔凌霄迥登攀俯九垓山河天際遶樓閣日邊開  
旛影依簷落鈴聲拂檻來馬江波浩渺雉堞勢縈迴  
隔嶺

留殘照遙空度晚雷炊烟生下土禪誦出香臺僧自山  
腰住人從樹杪回迷川今日渡劫火往年灰上界疎鐘  
動孤城斷角催幾思題偈別古壁半蒼苔

游榴花洞

逶迤羣峰隱紆迴一徑偏空山殘照裡古路斷雲邊入  
壑疑無地穿林覺有天鹿眠松下塢禽噪竹間泉芝草  
綠岡秀榴花滿洞然莓苔寒細雨桑柘隔孤烟但見山  
川舊誰知陵谷遷人皆迷漢姓居是避秦年不記來時

路因擠世上緣遲迴未忍去或恐遇神仙

己丑除夕志喜

一歲盡今夕悲欣異去年梅花送殘臘蓮炬吐芳烟淑  
氣回蕤莢條風度管絃老親懽膝下穉子戲燈前栢酒  
山妻進辛盤諸弟傳天倫有真樂喜極不能眠

箕踞軒贈郭聖僕

大隱不違親幽居少四隣跣趺依古佛箕踞對時人習  
懶成迂癖長齋了夙因形骸耽句瘦囊橐積書貧薜荔



裁奇服耕桑作外臣柴門多紫氣木榻絕紅塵詎以粉  
榆篤交於草莽真愧予貪問字忘却往來頻

瓦棺寺看月同吳翁晉梅季豹郭聖僕志若真  
全二上人分得圓字

問偈過諸天松間片月懸光分三世火影滅半林烟雲  
駛看疑運霜明望更鮮玉繩低下土金鏡照迷川悟景  
應知幻標枝可喻禪籟兼心共寂輪與果俱圓散彩高  
旂外生輝斷磬邊曉鐘催漸落長夜竟忘眠

茗溪逢謝長史姊大携家適至賦此志喜且以

為別

不謂飄零客能逢骨肉親乍同燈下語猶訝夢中身意  
緒兼悲喜關河各苦辛音初聞里閭事但話鄉隣細問  
兒童長空憐弟妹貧艱危前路甚消息故園真雖得懽  
携樂其如別淚新明朝又分手兩地共傷神

四月晦日邀屠田叔錢叔達陳彥宗陳汝翔王  
玉生陳惟秦陳幼孺王粹夫陳正夫曹能始

林子真興公弟西湖觀競渡分得寒字

高閣俯澄瀾湖光入座看遙空簫管咽夾水綺羅寒笑  
語連天沸呼聲動地懽揚旌過曲浦撾鼓下驚湍翠袖  
飄文檝紅標颭畫欄卧波蒼甲偃迴棹玉鱗蟠共聽菱  
歌度渾忘暮葉殘土風爭不禁禮法醉猶寬藉草情偏  
洽迷花興未闌日斜遊騎散墜珥滿江干

送李德威先生之樵川尋珠上人

何以度晨昏蕭然四壁存緇衣憐舊主白髮傍空門業

淨依菩薩家，貧任子孫餘。生拋不顧老，淚滴無痕事。  
空花過愁心，落葉繁願將。香積供千里，勸加餐。

怨歌行

恨極蛾眉感，情多鴈素沉。銀燈孤照影，錦薦獨傷心。  
粉褪雙顰玉，黃銷半臂金。解衣香氣冷，攬鏡淚痕深。  
蛩韻鳴殘杼，蛛絲網斷琴。羅帷明月鑒，珠被曉霜侵。  
願託巫山夢，為君長抱衾。

送屠田叔之官沅陵五十韻

爵服諸侯列聲華一代先英靈鍾岳秀詞藻動星躔入  
幕叅軍事含香侍御筵符分京兆貴禮典太常虔榷稅  
淮陽郡司嵯瘴海邊炎天舟載雪斥鹵竈生烟大隱官  
如水間曹吏是仙交遊盟草澤嘯咏狎林泉白屋身能  
下緇衣好獨偏掄才忘牝牡為政薄鷹鷂豈以官情累  
都將世味捐文章時倡和杯斝定留連車騎諳閭巷干  
旄耀市廛後生投刺滿多士過門闌不輟分題會寧辭  
倒屣延素心尤愷悌名理太淵玄董子惟常下江郎筆

更鮮形骸容放浪禮數畏拘攣結社裁詩律鐫書割俸  
錢考工存舊記情采著新編屈些增吳疏毛詩補鄭箋  
荔枝詞膾炙海錯譜流傳經施莊嚴寺僧皈大乘禪寄  
詩懷五岳留偈榜諸天樂府精宮羽謳吟叶管弦兩童  
供墨妙十吏捧丹鉛交誼町畦絕談鋒壁壘堅畫圖摹  
往哲俎豆祀高賢古道纔能爾今人詎有焉使君真嶽  
嶽公子果翩翩閩部方推重辰州急轉遷悲風寒凜凜  
遠道思綿綿共歎襟期隔還勞夢寐牽雙旌萬里去五

馬一城專問俗朱輪駕行春錦綬懸家元饒竹箭庭只  
掛蒲鞭眷顧恩三錫勲階祿二十辰砂菟古洞酉室檢  
殘篇沅水遙通沔峒溪近接滇鷓鴣聞竹浦雞犬覓桃  
川刀劍民爭賣襜帷帝許褰邏燈嚴夜堞耨火勸春田  
閩楚程難縮關山阻可憐傷離當此日投分已三年邈  
矣思良晤淒其念後緣歌聲宣鬱鬱書札訂惓惓往復  
虛青簡賡酬散白蓮感知心獨耿惜別淚空漣眠食須  
珍重功名合勉旃停驂頻悵望何地再周旋

仲冬十八日同王玉生陳伯孺幼孺興公弟送  
屠田叔使君自芋江登舟至因關時積雨初  
收川原競爽促膝繙書扣舷覓句香繞筆牀  
烟籠茶鼎情景清絕偶憶少陵野航恰受兩  
三人之句因令玉生繪圖共拆杜句為韻各  
賦一體以紀勝遊余拈得三字

擊汰芋江上前峰日半含山容晴亘翠水色淨拖藍帆  
飽行偏駛舲虛坐正堪榜歌喧浦口漁唱隱溪南鵲鶴



追殘照牛羊下夕嵐石棱衝浪瘦楓葉醉霜酣沈水香  
烟細烹泉茗汁甘雲霞諸子共丘壑衆情耽名理交叅  
伍新詩改再三風波童穉狎港路長年諳身入圖中景  
人為物外談浣衣臨曲渚洗硯覓深潭清福間能受玄  
言靜可探杜陵詩句好此境果無慙

贈歌姬愛卿十二韻

綺席開華館傾城得愛姬苑花輸靚臉宮柳學柔肢薄  
鬢瓊釵耀單衫寶帶垂嬌喉歌自嚶長袖舞偏宜纖月

橫蛾翠輕風馥口脂背燈偷賣眼臨鏡故顰眉性慧藏  
闔巧情多度曲遲明璫斜粉頸銀鈿約冰肌舊恨啼難  
訴新官對可悲暗調通繾綣微拒掩猜疑意洽重逢日  
魂銷欲別時流蘇空百結未足表相思

賦得團扇承落花

飛花霞並爛紈扇月同團素影留芳怨餘香戀合歡嬌  
疑障笑比朱訝掩唇看有意迎風易無聲到地難臙脂  
紛點鏡錦繡剪堆盤魂向輕羅散春從薄面殘班姬方

欽恨閨思况將闌

趙仁甫先生以叩竹杖見惠賦此荅謝

種本傳西域曾聞貢漢宮一枝非嶰谷萬里出蠶叢  
曳去穿雲際携來到水窮節應虛綠土頭可掛青銅  
莊叟逍遙外廬敖汗漫中未嘗臨俗客偶爾借鄰翁  
採藥兼歌往挑經與錫同靜綠幽徑曲詩興野橋東  
共步添良友扶顛當小童長房吾自媿君已似壺公

幔亭集卷十

欽定四庫全書

集部

幔亭集卷十一至三

詳校官中書

臣徐志晉

侍讀臣孫球覆勘

總校官庶吉士

臣倉聖脉

校對官中書

臣戴衢亨

謄錄監生

臣姜今熙

欽定四庫全書

幔亭集卷十一

明 徐燭 撰

五言絕句

子夜歌

牽絲嫌榦斷求藕恨泥深  
風吹菡萏折那得見蓮心  
籬外種都梁籬內種黃蘗  
雖是愛他香籬心苦難說  
芙蓉面可憐卷施心不死  
紅豆落深坑到底相思子

錦帳覆雕牀銀鈎宛相向何時得見郎鈎起合歡帳  
亂却曲中心只為音徽誤郎來續舊絃知移何鴈柱  
採桑飼春繭葉稀蠶不飽一繭著歡衣與歡綿太少

春歌

羅衾與角枕展轉有誰憐妾身不如柳一日尚三眠

夏歌

朱夏日何長采蓮向南浦妾心未剥蓮只在房中苦

秋歌

秋風吹江湄采芳寄相憶妾貌如芙蓉朝昏幾變色

冬歌

寒威動房帷悲風起羅薦妾恨井中冰結時君不見

少年行

駿馬千金買銀鞍錦障泥未諳邊塞苦日日玉樓嘶

秋怨

何處飛紅葉深宮不見秋可憐雙眼淚空對御溝流

怨詞

一從閉深宮不復徵歌舞房中今夜聲是妾當年譜

魏宮怨

掩袂高臺上春風散綺羅西陵望不見明月照漳河

昭君怨

掩淚拋長袖從今歌舞稀肯將邊地月來照漢宮衣

玉階怨

殘露侵羅袂深宮漏正長螢光隨月影點點過昭陽

別離曲



牽衣贈一言君還能聽否但看上林花莫折章臺柳

洞房曲

檀郎意憨癡留燈照綽約郎嫌羅帳深儂嫌羅帳薄

新嫁娘

薄帷鑒明月宛轉憐嬌態郎來解羅襠含羞掩裙帶

古意

低聲猶掩袖未許小鬟知料應無別語只是說相思  
海燕故雙栖池花自連理解却紅羅襦知君憐下體

巫陽生繡戶春色滿雕牀  
揉將花瓣碎分得口脂香

懷高涼李大

別夢縈千里愁心隔五湖  
亂山風雨裡相憶一燈孤

寄劉季德

落日催歸馬離心寄酒尊  
一從分手後風雨閉柴門

聞鴈

忽起蘆花渚哀聲入亂雲  
空閨多成婦莫遣夜深聞

自遣

遞跡在空山生涯寄場圃柴門到者稀滿地梨花雨

送張叔弢

關門風雨多相送日云暮今宵山館中夢繞秦川路

逢雪宿華嚴閣

佛火懸青嶂鐘聲下翠微蕭蕭風雪夜猶有一僧歸

山館

地僻稀來往空山日正長晚涼新睡覺古木自斜陽

哭曾大

知音成死別痛絕壁間琴不盡西州感衡門芳草深

山中

散步入空林斜陽滿山麓四顧寂無人蟬聲出修竹

薄暮

匹馬黃沙路蕭蕭欲斷魂天涯多少恨况乃近黃昏

馬上

去國八千里堪嗟行路難馬頭天欲盡猶不見長安

警急

聞說臨洮府今年沒敵塵  
願圖恢復策不必議和親  
逢俠者

了不知名姓偶遇長安市  
片語忽相投  
懽然結生死  
江行雜咏

小徑隱叢薄危橋跨斷雲  
前林多少樹霜葉落紛紛  
江濶帆影遲夜久砧聲歇  
深嶂歸暮雲寒波漾明月  
暝色沉孤嶼殘雲冷釣艘  
一聲長笛響秋意滿空江  
返照有餘景西風無限情  
暮蟬與孤鴈處處送秋聲

對雨

寒窗一夜雨山色幾重青會得靜中意焚香看道經

客中除夕聞鐘

客路當除夕淒涼倍憶家鐘聲何太急斷送舊年華  
為客他鄉暮鐘聲出曉雲可憐今歲裡只此一回聞

送王玉生

作客生涯薄依人去住難春光無限好空向異鄉看

江上再送汝高

相送江樓暮風烟黯自愁君行是得意不敢淚雙流

客中寒食

去歲燕山道今朝劍水濱如何兩寒食俱作異鄉人

除夜芝山寺訪瀚公

故院知何處他山度歲華空門無去住有佛即為家

寄王震甫

三年巴蜀客萬里故人心若比瞿塘水思君應更深

懷鄭性之

別去無消息相思空斷魂中原多俠客誰是孟嘗門

錦溪八景為林熙吉題

團青島

春風吹錦溪秀色盤孤島花落滿蒼苔莫遣家童掃

積翠臺

振衣陟高臺嵐光翠欲滴半夜春雨來飛泉瀉石壁

五雲岡

高岡有五石石皆生雲晏坐松根下前林正夕曛



七星塢

怪石眠芳蘚危橋傍草亭寥寥人境外花塢帶春星

遷鶯林

曉步遷鶯林鶯聲何覓覓把酒坐垂楊不覺歸來晚

宿猿洞

峴山奇境饒古洞藏幽谷雲深不可尋但借玄猿宿

蘿徑門

山中石作門迫窄不可步回首望藤蘿迷却來時路

松風壑

風生松壑中  
濤聲聒人耳  
中有綠髮翁  
長伴赤松子

過能仁寺

東郭西天近  
禪宮古廟隣  
從今朝暮裡  
鐘鼓一何頻

題畫

日落溪水寒  
林疎秋色老  
柴門閉白雲  
滿樹丹楓老  
森森灌木陰  
渺渺澄江靜  
一棹獨垂綸  
中流釣山影  
振衣危峰巔  
扶桑日初起  
柳色破青烟  
桃花帶流水

江上漫成

遊人戀故鄉每恨離家遠如何石尤風又嘆舟行晚

西寺尋公朗上人因同宿小舟

尋僧入招提斜陽下疎木只恐隔關門同到舟中宿

記夢

夢與雙親別牽衣兩淚垂不知成永隔猶道暫相離

送吳翁晉還吳興

如何布衣至依舊布衣歸且向苕溪曲三年守釣磯

失劍

恩讐俱未報失去竟何心難將延陵劍不及少原簪

得劍

神物合雄雌歸來事太奇精光猶未滅會有報恩時

漂母祠

落落千金報悠悠國士心從今慚漂母不敢過淮陰

歸渡揚子江

歸來風波平去日風波作世路非風波來往風波惡

吳門逢鄭四

幾載天涯別逢君空自悲知無桑梓念不敢問歸期

將至武夷

莫謂僊源近舟迴路幾重他山苦相蔽不見大王峰

咏殘燈

空房心膽怯燈影半將殘攬衣頻起剔揚彩伴更闌

山行口占題建溪驛壁

客路當殘歲淒然正憶家山童不解事停馬折梅花

題鄔子遠扇面山水

長松蔭遠山虛亭倚危石何來客杖藜曳破秋雲碧

題梅花畫扇

春信江南早淒然念故鄉忽看紈扇影轉憶壽陽妝

呂梁洪

呂梁洪下水已變作安流安流雖自好只是滯歸舟

題沈從先扇面畫蘭

國香零落久幽谷忽成叢移向齊紈上期君臭味同

題公朗扇上畫梅

紈扇寫寒梅懷袖微香發山僧骨相清對之雙幽絕

迴文詩 迴環讀四十首

綠波迴斷港青嶂陰孤村谷蘿開亂莽汀浪浸疎園

芋江驛樓口占送王元直重游金陵

揜淚懷前事送君無限悲經過多舊處何處更相思  
夜月烏衣巷秋風燕子磯山川仍似昔只是舊人非

幔亭集卷十一



欽定四庫全書

幔亭集卷十二

明 徐燭 撰

六言絕句

舟中雜言

白雲一片兩片翠微干重萬重孤客尚餘短劍青山何處  
疎鐘

處處桃花欲笑枝枝柳葉含顰白壁卞和泣楚黑貂季

子歸秦

雲外疎星點點沙邊小艇雙雙一曲孤琴有譜數聲長  
笛無腔

雲際鷓鴣格磔花前蝴蝶踟躕隔岸野橋跨水空山古  
墓犁田

題伯孺畫小景

天際孤舟帶雨沙邊竹杖穿雲村落半藏宿莽危亭獨  
瞰江濱

戊子除夕飲顧道行先生諧賞園

游子驚聞爆竹高堂誰薦椒花諧賞園中地主姑蘇城外天涯

白鴈久無家信青袍虛度年光自覺夢中是客何言醉處為鄉

題畫寄閔壽卿

溪路一曲二曲人烟三家兩家野飯唯供澗藻山衣自緝園麻

草閣雲生雲滅柴門風閉風開峰影溪中流去瀑聲天外飛來

山居四時詞

樓外桃飄紅雨階前苔繡青  
檀燕影差池似剪鶯聲  
睨如絃

亂蟬爭噪高柳倦鳥獨棲  
古簷新茗半甌睡起  
局斜陽

天末金風薦爽夜深玉露生寒  
黃菊含苞欲吐芙蓉褪

粉將殘

牆北梅枝破玉地中葭管飛灰爐燼呼童續火雪深邀  
客銜杯

漁

江北清波細浪溪南暮雨西風短笛黃蘆花外扁舟紅  
蓼叢中

樵

歷盡白雲千嶂挑歸黃葉一肩但願瓶中有粟不愁厨

下無烟

耕

暮雲芳壠十畝春雨寒郊一犂水上插秧穉子田頭持  
饁山妻

牧

處處平原綠草村村荒坂斜陽自信坐牛背穩誰知騎  
馬蹄忙

幔亭集卷十二

欽定四庫全書

幔亭集卷十三

明 徐燠 撰

七言絕句

登揚州城樓

淮水微茫遠接天  
隋宮秋草自芊芊  
當時歌舞人何在  
落日空山聞斷蟬

錢唐別友

日落津亭一別君  
數聲猿叫不堪聞  
明朝回首錢唐路  
惟有秋山隔暮雲

江上送客

片帆遙向洞庭遊  
湖水茫茫一色秋  
別後思君腸欲斷  
不堪重倚夕陽樓

蘇小小墓

疎林落葉亂孤村  
芳草萋萋滿墓門  
惆悵美人今不見  
寒鴉棲盡又黃昏



春日懷舊

落花寂寂柳依依  
日暮空山獨掩扉  
雙燕不知人去遠  
年年猶繞畫梁飛

彭城懷古

雲龍山下鳥爭啼  
戲馬臺前日欲西  
莫謂楚宮今寂寞  
五陵芳草正萋萋

聽角思歸

白草黃榆不見春  
十年遼海困征塵  
夜來正有還鄉夢

殘角一聲愁殺人

野店逢故人

野店鶯啼柳自垂  
故人相見不勝悲  
明朝又作沅湘別  
江海悠悠無盡時

淮陰夜泊

淮陰城下暫停舟  
明月無情水自流  
漢代王孫今不見  
惟餘春草滿汀洲

客中贈別

吳姬把酒唱離歌一片愁心奈別何  
莫怪相看頻下淚江南春色已無多

武林與子卿宿別

渺渺疎鐘月下聞天涯相見復離羣  
秋風一夜孤帆遠遙隔吳山幾片雲

丹陽遇陳十八

丹陽渡口遇同鄉欲語匆匆怨夕陽  
君返江南我江北雲山千疊斷人腸

送人遊秣陵

送君西去秣陵游，萬里寒江日夜流。  
酒散離亭人已遠，亂山殘雪一孤舟。

感舊

一別心知萬里遙，孤燈空對可憐宵。  
因思十五年前事，月色簫聲共寂寥。

東原別歌者周郎

縹緲尊前一曲歌，相逢其奈別離何。  
數聲殘角霜天曉，

馬首無情幽怨多

過黃逸人幽居

行到山中日已昏一聲寒犬出孤村  
青苔滿地無人跡風落殘花閉洞門

靈巖菴懷珠上人

踏遍烟霞萬壑深洞門空鎖薜蘿陰  
一從瓢笠過南海十載遊蹤無處尋

曾同老衲共安禪回首春風已十年  
此日重經香火地

佛燈無燄竈無烟

客中送人之粵西

客路相逢各斷腸  
明朝身在瘴雲鄉  
荒原野店無人住  
古木蕭蕭空夕陽

軍城早秋

落日荒城起暮笳  
蕭條秋色滿黃沙  
一聲塞鴈西風裡  
十萬征人盡憶家

金陵懷古

一自東南王氣消  
秣陵秋色冷蕭蕭  
如今宮殿生禾黍  
無復繁華似六朝

訪羽人不遇

千峰萬壑羽人家  
鐘磬無聲日已斜  
閉却洞門春寂寂  
晚風吹落紫藤花

湖上晚望

半天夜月漏初稀  
渺渺澄波浸翠微  
一道香風何處起  
隔溪游女採蓮歸

秋夜聞笛

殘月微微玉漏深  
一聲長笛起秋陰  
天涯多少懷歸客  
獨對西風思不禁

東莊晚眺

舊遊風景易蹉跎  
古路松陰翳薜蘿  
樵唱盡歸門巷寂  
蕭蕭殘柳夕陽多

贈少年

天涯相見正新秋  
滿目西風共倚樓  
月下按箏歌一曲



聲聲都作小涼州

宮怨

金鎖重封院宇深  
鑿與消息總沉沉  
君王何處看歌舞  
負却長門夜夜心

遙聞玉輦過昭陽  
歌吹聲中欲斷腸  
一閉深宮經十載  
夢魂無自識君王

冬日到山家

十里青山古木平  
半溪殘雪夕陽明  
小橋流水門深閉

但聽雲中雞犬聲

送人貶崖州

瘴雨蠻烟道路長  
憐君何事此投荒  
他時縱有相思夢  
萬里風波正渺茫

酒家贈別

十載分携無定蹤  
誰知此日酒家逢  
五更酒醒東西去  
又隔雲山千萬重

交河道中

蕭條殘柳不勝秋滿目山川對戍樓今日獨經征戰地  
黃沙漠漠使人愁

漢宮春曉詞

長信宮中玉漏微綠楊枝上乳鴉飛忽聽銀鑰開金鎖  
殘月樓頭照舞衣

枕上頻聞女伴催任教初日上妝臺玉肌應共東風軟  
正夢昭陽侍寢來

宿霧霏微御柳青水晶簾捲見殘星傳言禁漏聲休促

昨夜君王酒未醒

鶯聲睨睨出花枝  
腸斷流蘇夢覺時  
一派管絃何處起  
遙知別院拜昭儀

送老僧

行盡天涯與海涯  
閒雲孤鶴伴袈裟  
歸看手種門前樹  
開遍春風幾度花

二月晦日送人之安南

杜宇聲中夕照斜  
長途征馬踏殘花  
春光今日歸何處

莫是隨君到海涯

驅車萬里向蠻天人去春歸總可憐同是別離君更速  
君行猶在曉鐘前

寒食郊行傷少文

春風羸馬出郊垆忽憶心知涕淚零最是無情墳上草  
年年寒食自青青

送人出塞

黃塵漠漠暗征衣楊柳青青折漸稀試問玉門關外路

幾人西去幾人歸

七夕聞砧

天上雙星正渡河  
人間砧杵晚來多  
閨房若待秋風冷  
絕塞寒威可奈何

長門怨

芳草何時輦路通  
長門花鳥自春風  
總緣薄命難承寵  
不是相如賦未工

金谷園

聞說佳人此墜樓  
青山長在水長流  
明珠已與珊瑚碎  
尚有香魂夜出遊

青塚

誤殺婁娟是畫圖  
千年孤塚長蘼蕪  
春風似亦憐芳質  
不遣窮陰草色枯

楊白花

楊花如雪葉如絲  
無奈東風一夜吹  
飄落不知何處所  
年年腸斷暮春時

宮人斜

春雨春風粉黛銷誰憐黃土葬妖嬌墓門幸與諸陵近  
夜夜香魂不寂寥

紅葉怨

紅葉詩成暗自愁御溝泉咽不堪流願將一掬相思淚  
添得潺湲出御溝

薛濤墳

玉壘山高錦水流黃泉何處覓青樓墳頭種得桃千樹



花落花開怨未休

溫泉宮

羯鼓聲中酒未醒  
華清浴罷轉娉婷  
可憐萬古溫泉水  
難洗漁陽戰血腥

馬嵬驛

蛾眉宛轉倍堪憐  
永別君恩赴九泉  
千載馬嵬山下路  
傷心最是佛堂前

宮詞

忽聽昭陽歌吹聲倚欄無語不勝情  
青青長信宮前草  
盡是鑾輿去後生

古意

郎自傷心妾斷腸  
夢中逢妾妾逢郎  
一聲砧杵一聲恨  
別意長如秋夜長

郵亭殘花

征途微雨動春寒  
片片飛花馬上殘  
試問亭前來往客  
幾人花在故園看

聽舊宮人歌

一從紅葉御溝流，別却深宮幾度秋。  
莫向尊前歌舊曲，哀聲容易使人愁。

擬九日客中登高

獨對青山酒一尊，他鄉秋色易消魂。  
可憐舉目關河異，惟有黃花似故園。

客中歲月易蹉跎，此日登臨共醉歌。  
莫以天涯生感慨，他鄉時少故鄉多。

黃花空向客邊開，愁聽尊前白鴈哀。  
縱使登高也無益，青山不是望鄉臺。

滿徑寒花綠酒前，客中愁緒轉淒然。  
也知故國山長在，只恨登高是隔年。

訪陳平夫箬坡別業

澗水滌澗綠樹稠，白雲長鎖洞門幽。  
此中自與塵凡隔，一任桃花引釣舟。

長安感懷

一領征衣半淚痕  
思家何日不消魂  
桃花落盡鶯聲老  
猶自飄零客薊門

過陳薦夫幽居

柴門寂寂晝常關  
猿鳥聲中鶴夢閒  
欲識武陵溪上路  
桃花無數水潺湲

秋怨

梧桐葉落正新秋  
如水君恩別處流  
獨倚朱欄過夜半  
一聲歌管六宮愁

送人從軍

秋風一夜別家山  
萬里從戎幾日還  
此去正當離亂後  
斷腸多在穆陵關

酒店逢李大

偶向新豐市裡過  
故人尊酒共悲歌  
十年別淚知多少  
不道相逢淚更多

隴西行

一別家山萬里長  
多年白骨委沙場  
游魂已逐邊塵散

空有高臺築望鄉

仗劍封侯事已非  
閨中少婦葬征衣  
玉門關內多邊馬  
縱有游魂不敢歸

楚宮怨

黃土埋香翠黛銷  
楚妃魂逐楚雲飄  
愁多自殞如花貌  
豈為君王愛細腰

吳宮怨

高臺日日翠華臨  
何事顰眉更捧心  
本是苧蘿山下女

吳中恩淺越中深

秦宮怨

宮中無復望車塵已分阿房老此身縱使君王得相見  
也應不愛白頭人

漢宮怨

寵幸當年不省憂六宮那許近宸旒一從廢入長門裡  
始解宮中失寵愁

魏宮怨



一夜東風殺氣銷起憑妝閣思無聊銅臺自有如花貌  
何必江東大小喬

晉宮怨

恩寵由來有淺深至尊行幸豈無心蛾眉不解君心巧  
空聽羊車竹外音

齊宮怨

遙見潘妃綽約來六宮紅粉一時迴隔花聽得君王笑  
知是金蓮步步開

梁宮怨

深宮長日閉蒼苔恩寵于今念已灰  
莫望他生更相見  
君王行滿不輪迴

隋宮怨

江南江北翠旂遙夜夜深宮鎖寂寥何處  
龍舟試歌舞  
秦淮明月廣陵潮

唐宮怨

一曲霓裳舞未休月光如水上簾鉤  
夢迴忽聽笙歌沸

猶是華清夜打毬

下邳阻風

邊風颯颯捲黃沙白浪連天湧作花  
野店無人門盡閉  
夕陽衰柳帶寒鴉

彭城元夕懷故園諸友

故國春宵正可憐九衢燈火吐春烟  
舊遊已共晨星散  
月色遙知似去年

馬上姬

紅粉青娥白苧衣一鞭柳外踏青歸中裙妬殺桃花馬  
九陌香塵撲面飛

窈窕佳人跨繡鞍香風吹動綠雲鬟最憐二月長堤柳  
一路青青送玉顏

別劉少已馮希呂

都門慷慨別同驩劍氣冲霄馬上看一自荆卿歌變徵  
蕭蕭易水至今寒

鄭城感舊

匹馬還家春正深  
路傍楊柳盡成陰  
當壚少女今何處  
門鎖寒烟不可尋

進香詞

貌似桃花鬢似雲  
銷金抹額石榴裙  
一派管絃齊上馬  
手持香瓣禮元君

月夜

鶯花三月出燕關  
千里家鄉幾日還  
今夜月明天似水  
夢魂先到武夷山

懷平夫

雪花飛盡柳花飛  
目斷南天鴈影稀  
月落屋梁人不見  
空餘清夢遶漁磯

劍浦懷宗思兼先生

劍氣冲霄水亂流  
故人曾共木蘭舟  
年來老病如宗炳  
畫裡青山卧裡遊

過陳山人隱居

茆齋斜瞰武陵溪  
萬樹桃花兩岸齊  
閒倚杖藜看乳燕

薜蘿衣上落香泥

竹枝詞

美人門對錢塘江水透蘇堤月透窻莫怨裴航仙夢晚  
種來玉杵未成雙

妾住西湖舊狹邪孤山深處是郎家郎若重來須細認  
湖邊新種碧桃花

楊柳堤邊去採蓮柳枝低拂采蓮船分付兒童休浪折  
留侍郎來作馬鞭

忽聽樓頭鼓亂敲  
模糊月色上花梢  
郎今去住無消息  
暗擲金錢卜一爻

送鄭翰卿遊燕

慷慨辭家事北遊  
黃沙萬里使人愁  
市中擊筑悲歌日  
為覓荆卿舊酒樓

大夢山前片月孤  
送君走馬入燕都  
黃金臺上生秋草  
猶有當年駿骨無

六溪夜泛



暮潮初漲月痕低  
一葉蘭舟過六溪  
唱罷滄浪天漸曉  
青山無數鷓鴣啼

烏石山訪虛公

飛錫何年住此山  
長松修竹掩禪關  
斜陽影裡暮鐘發  
三十六峰烟靄間

春日郊行

春風初動暮雲平  
十里芳郊信馬行  
山色蒼蒼溪水綠  
杏花村裡鷓鴣聲

西湖八景

仙橋柳色

迎仙橋畔萬條絲  
淡蕩春風二月時  
知是踏青歸去晚  
幾多游女唱楊枝

大夢松聲

澄湖滌繞越王城  
十里湖光似鏡平  
怪得寒濤何處起  
前山無數亂松聲

古堞斜陽

百尺高樓接女牆猶傳閩越舊封疆  
可憐霸業歸何處惟有寒鴉帶夕陽

水晶初月

孤山深處水晶宮畫舸歸來信晚風  
歎乃歌殘天似水一痕新月上湖東

荷亭晚唱

虛亭遙跨水中央五里荷花十里香  
度曲女郎齊拍手一聲驚散兩鴛鴦

西禪曉鐘

湖上邀賓卜夜驩勝遊休問夜漫漫天雞叫罷晨星落  
猶聽鐘聲出寺殘

湖心春雨

滉漾平湖影碧空千重樹色盡朦朧春光何處尤堪賞  
多是梨花暮雨中

澄瀾曙鶯

子與風流天下聞初來高閣欲凌雲曉鶯不道年華變

猶自聲聲喚使君

青樓俠氣贈李姬

阿嬌俠氣滿紅樓不肯輕身事貴游  
昨日五陵公子過  
青衣傳語未梳頭

文章元不屬蛾眉紅粉誰知唱麗詞  
袖裡雲箋裁五色  
客來題出斷腸詩

玉貌元同蘇小娟清謳一闋最堪憐  
歌聲未斷尊中罄  
猶卸金釵當酒錢

綠雲慵理黛痕銷時把金簪竹上敲但得黃金能買賦  
何須珠翠鬪妖嬈

寄題朗公寶函樓

一瓢一鉢一經函幡影燈光對佛龕百尺樓中皆淨土  
蓮花千葉坐瞿曇

重過面壁洞訪熙工

躡屐重過積翠臺當時屐齒半蒼苔桑麻雞犬還如舊  
洞口桃花幾度開

宮詞

翡翠衾寒曉漏遲  
博山香燼夜何其  
起來試揭珠簾看  
月在梨花第一枝

莫怨鑿<sup>與</sup>寵幸稀  
九重天子正宵衣  
雲和一曲閒清晝  
乳燕簾前作對飛

對月荅鄧汝高

共對秋山月影寒  
尊前莫惜盡餘驩  
不知故國秋山月  
能得尊前幾度看

春日懷王少文

去歲逢君花下飲  
閒庭花落正紛紛  
于今又是花時節  
但見花開不見君

訪程子暉

草閣秋深露氣寒  
白龍江上暮雲殘  
輕舟泛入桃源裡  
兩岸芙蓉一釣竿

元夕懷李伯實

往事傷心倍可憐  
故人今夜渺雲天  
燈光月色鞦韆影



已隔春風二十年

送李子行太守謫茶陵

一官何事又投荒  
楚峽猿聲幾斷腸  
正是長沙遷謫地  
不堪夜雨度瀟湘

不為相逢歎陸沉  
總緣離別易傷心  
孤臣命似湘雲薄  
聖主恩同漢水深

楚江遙望隔天涯  
盛世南遷道路賒  
滿目春光無限淚  
清明風雨馬頭花

春雨瀟瀟春草微  
片帆遙逐楚雲飛  
此行若過湘江路  
莫弔三閭弔二妃

寄黃白仲

家在西湖第幾峰  
白雲無數水重重  
烏啼花落春光暮  
同聽南屏寺裡鐘

與瀚公宿綠玉齋

幾年踪跡各西東  
一點禪燈此夕同  
對坐空山天籟寂  
滿林花雨月明中

金山別閨齡

古寺鐘殘暮靄收  
人烟起處見瓜洲  
長江渺渺愁無盡  
況上秦淮萬里舟

芋江驛樓送張四之白下

春風吹柳萬條斜  
此去金陵驛路賒  
不必相思當後夜  
片帆開處即天涯

懷謝在杭司理

一片愁心兩地分  
三年人隔五湖雲  
從來未識苕溪路

只是思君不夢君

仙宗寺

古寺荒涼蔓草生  
青山迴合暮雲平  
當年遺蹟俱塵土  
惟有流泉是舊聲

自鼓山歷鳳池尋白雲洞不得誤抵山麓而歸  
口占寄趙用拙居士

岩嶺徑路杳難分  
猿鳥哀呼日半曛  
莫謂洞門今咫尺  
不知猶隔幾重雲

桃花流水自潺湲  
曉起尋君日暮還  
不是漁郎迷去路  
斷無踪跡在人間

湧泉寺懷融上人

憶昔團焦住化城  
蕭蕭風雨佛燈明  
于今重借雲房宿  
無復當年禪誦聲

與陳惟秦鄭震卿宿老禪菴

古寺鐘殘夜已分  
三人同卧一牀雲  
他時此地聞鐘夜  
未必連牀又是君

哭王少文秀才

王郎本是大羅仙，暫謫人間二十年。  
一夜緱山仍控鶴，滿天風露冷嬋娟。

去年春暮禁烟寒，把酒看花共倚欄。  
此日花開君不見，黃壚相隔路漫漫。

韶黜能詩便有聲，筆花長向夢中生。  
如今玉樹埋黃土，誰繼風流竹下盟。

素箋如練墨如雲，年少臨池獨有君。  
舊日蘭亭今寂寞。

不堪開篋見遺文

長吉當年賦玉樓  
憐君猶少七春秋  
傷心處處生悲感  
何必山陽始淚流

綿綿幽恨幾時銷  
金屋無緣貯阿嬌  
虛度春光二十載  
看花不及詠桃夭

猿鳥聲中晝掩扉  
竹陰依舊故人非  
思君忘却幽明隔  
猶怪音書近日稀

一別黃泉路杳冥  
愁雲空鎖草玄亭  
即今風雨羅山夜

猿鳥哀呼不可聽

魂魄悠悠到夜臺應知塵世不重來從今綠玉齋前路  
一任春風長碧苔

記得孤齋晚眺時倚欄連袂共題詩山中每到斜陽後  
便覺傷心雙淚垂

遊仙詞壽陳汝大

半生蹤跡寄烟霞煉就丹壚九轉砂鶴背鸞笙明月夜  
一聲吹過碧桃花



山自蒼蒼海自流難將甲子記春秋羣真歲歲稱觴日  
但見黃花滿洞幽

年少曾窺寶笈文青山長禮紫陽君洞門盡日無烟火  
自掃松花吸白雲

琪花瑶草滿松關猿鳥聲中鶴夢閒欲識武陵溪上路  
白雲無數水潺湲

代鄭翰卿閨人秋日寄遠

良人何事滯京華日醉青樓不顧家獨宿空閨今幾載

又驚秋色上蘋花

梧桐葉落火西流  
君住長安又一秋  
莫向邊庭思仗劍  
書生從古幾封侯

芎蘿村

越國荒村說芎蘿  
曾聞此地幻嬌娥  
浣紗遺跡知何處  
滿目悠悠空綠波

七夕觀妓

玉露凋瀼片月明  
人間天上此時情  
紅樓不似銀河隔

一任隣雞報曉聲

感事

莫嘆吾家似磬懸  
資生猶有賣文錢  
不知萬落千村裡  
多少人家絕火烟

訪黃道晦

桑麻雞犬自成村  
溪口雲深絕洞門  
有客遲回空日暮  
不知何路到花源

口占戲贈道晦

家難相尋已十秋半居城市半林丘此身已是空門客  
只欠披緇物外遊

送林伯溥還金陵

落魄江湖歲月更相憐何必是平生送君忽起并州感  
衰柳秋風白下情

秋夜即事

秋宵殘雨上窗紗一點流螢照暮花覓得輕羅穿竹徑  
已隨風葉過隣家

贈潘郎

白晳脩眉紫綺裘  
春風挾彈美遨遊  
幾多紅粉羞顏色  
果匿懷中不敢投

小箬溪懷邵夢弼

當年此地共揚舠  
一入泉臺竟不醒  
墓上白楊今老大  
江頭古木自青青

送張叔弢之官昌化

一官南北總君恩  
只為風波易斷魂  
古了啼春山路寂

五更烟雨過蠻村

五嶺梅開歲欲殘  
朱崖南去路漫漫  
莫言炎海無冰雪  
一領青氊六月寒

官冷携家乏俸錢  
獨將桃葉海雲邊  
玉顏未慣蠻天苦  
同醉檳榔辟瘴烟

留別曹能始

驛樓相別不勝悲  
握手殷勤問後期  
何處壚頭同一醉  
冷風殘雪薊門時

一別青山謝薜蘿故人今夜隔關河客中無限相思淚  
纔到思君淚更多

西去長安路渺漫天涯蹤跡覓來難我今到處題名姓  
待汝經過到處看

夢中忘却已分離只解歡娛不解悲半夜蓬窗驚覺後  
始知相別已多時

與王生對酌

共是飄零客裡身壚頭沽酒莫辭頻他時去住分南北

歸路同舟是別人

過昭慶寺

幡幢高拂六橋烟坐久無僧可問禪  
一寺袈裟三百衆寺門都趁賣經錢

湖上書所見

二八妖姬淺淡妝獨搖蘭漿水中央  
湖光勝似華清水不染人間粉黛香

戲呈朗公



西風半夜起松陵萬里孤舟一點燈莫為離家腸易斷  
無家猶有少年僧

禦兒舟中別朗公

月下談深睡去遲滿身涼露夜何其雞聲未斷鐘聲起  
又是江頭欲別時

夜泊即事

夜靜停舟傍水湄隔舟人語許多時起來試倚篷窗聽  
盡是思鄉怨別離

松陵夜泛

一片輕帆掛月明  
微茫何處辨孤城  
已看燈火星星近  
猶隔西風數里程

澣墅關懷王百谷

楓橋西下夕陽斜  
重到關門問酒家  
記得當年分別處  
一船秋色載黃花

楓橋夜泊夢鄧汝高進士

燕吳遙望隔天涯  
魂去魂來只自知  
夢裡頓忘裘馬貴

相逢猶似布衣時

舟中對酒懷陳子卿

橫塘烟雨不勝愁  
滿目山川憶舊遊  
今夜一杯三白酒  
猶疑同醉太湖舟

夜雨

客路逢秋夢易醒  
空江烟雨晚冥冥  
數聲夜半孤篷外  
不似高齋竹裡聽

懷任夫

天涯雖自嘆離羣不用題書更寄君  
日日同游有諸弟  
一回書寄一回聞

朝天宮贈沈道士

迴廊九曲隱星壇霞珮螭衣偃月冠  
唱徹步虛詞一闋  
白雲滿地磬聲寒

桃葉渡訪張幼于

淮水東邊楊柳新白頭猶醉曲中春  
尊前試看紅妝女  
誰是當年勸酒人

青溪逢吳叔嘉投贈

廣陵雲樹秣陵烟  
兩地飄零共幾年  
老母七旬家十口  
資生惟有賣書錢

尋汪堯卿不遇

落葉蒼苔滿徑幽  
懷人空對秣陵秋  
秦淮渡口無蹤跡  
一日看花十四樓

鷺峰寺逢趙用拙

白雲洞裡覓無蹤  
何意青溪得再逢  
無却是真逢是幻

欲將真幻問南宗

茗川尋錢叔達不遇時叔達在閩

我客茗川君客閩天涯同是未歸身應知兩地相尋處  
俱閉閒門不見人

夜坐懷玉生

冷衾如水室如冰未盡更籌欲盡燈回首舊遊多感慨  
雙雙騎馬戲金陵

疎林明月照匡牀一點孤燈淚萬行夜半頓忘人已別

詩成猶自問王郎

吳興感懷呈在杭

客中何事太淒然，不得歸闕未到燕。  
囊橐漸空游漸倦，故人離別又殘年。

咏燕

燕子嬌飛羽翼齊，呢喃時向小窻西。  
只因舊壘營初定，縱有雕梁不敢棲。

過錢功父懸磬室

一室依然似磬懸  
傳家負郭舊無田  
礪鵝劍售鵝裘典  
只有藏書不賣錢

再尋王太古不遇

梅花影裡訪幽棲  
門掩寒塘水滿堤  
兩度相尋不相見  
一帆風雨出梁溪

渡江

一葉扁舟逐浪飛  
罡風吹浪上征衣  
他時縱有南歸夢  
夢見濤聲不敢歸



交河道中

路入交河日半曛  
北征車馬各紛紛  
如何一片黃沙地  
能勝青山與白雲

黃沙漠漠馬驂驪  
北地春光久自諳  
不用褰帷縱游目  
斷無山色似江南

旅店感舊

壁上題名八九春  
重來疑是夢中身  
幾迴欲覓題名處  
忘却誰家是主人

燕南道中懷君大熙吉熙工玉生諸子

蕭蕭羸馬向天涯  
一片黃塵滿面沙  
記得去年春雪裡  
白雲莊上看梅花

咏道傍柳

一片東風一度新  
生來不見上林春  
莫言此物無情甚  
送盡天涯落魄人

新城阻雨

寂寞孤村獨掩門  
幾家燈火近黃昏  
一般寒食梨花雨

此地聽來更斷魂

東阿道中

馬上青山夕照明  
看山應動故鄉情  
雖然不及江南好  
猶勝平原曠野行

陽谷馬上戲作呈幼孺

萬樹垂楊送客行  
春風三月未聞鶯  
上林此日方千轉  
不向歸人喚一聲

過東平城北元故丞相墓

誰家翁仲卧荒墳聞是先朝舊相君  
三百年中來往客  
幾人下馬看碑文

汶上感舊

汶水匆匆唱渭城春風一別數年情  
知君本是飄零客  
未必重逢在此生

同幼孺馬上見桃花

寂寂山家半掩門却憐春色滿荒園  
同行不覺旗亭遠  
看盡桃花又一村

宿界河驛夢從許靈長索書蘭亭記

折柳都門路遂分故人回首隔烟雲不知此別千餘里  
猶乞蘭亭學右軍

過薛君故城

高臺傾盡曲池平此地猶傳薛故城珠履三千俱寂寞  
行人空動雍門琴

掛劍臺

公子當年然諾深千金寶劍掛空林應知十字碑題後

泉路相逢無愧心

亞父塚

亞父孤墳蔓草荒  
行人何用歎興亡  
漢家多少功臣骨  
若箇能歸葬故鄉

彭城感舊

落盡天桃萬樹花  
傷心重問舊琵琶  
平康門巷多相似  
不記垂楊第幾家

戲馬臺今改為昭烈廟

英雄千載說喑啞此地曾經戲五花只有荒臺留不得  
依然香火屬劉家

廣陵別陸無從

客路相逢嘆二毛片帆南下月輪高他年一枕揚州夢  
滿樹璫花萬頃濤

舟抵京口作

舟過金焦日未斜回看瓜步即天涯故鄉雖隔三千里  
得到江南似到家

丹陽舟中與幼孺對月時余南還幼孺將客茗

川

共倚孤蓬月似霜夜深風露滿胡牀應知此月重圓夜  
君在他鄉我故鄉

懷平夫

客裡思君路渺茫回看往事更淒涼十年夜半羅山雨  
若不銷魂也斷腸

懷惟秦



江上春風吹布袍題詩千里問蓬蒿  
君還記得當年事  
竹下焚香讀楚騷

題落日孤舟扇面送幼孺

古木蒼蒼落照收誰人獨自汎中流  
燈前不敢披圖看  
恐是松陵別後舟

夾浦橋感舊寄謝在杭

夾浦橋西芳草新當時此地共迷津  
年來買徧松陵棹  
猶是江邊失路人

重集諧賞園憶歌者陳情

龍陽窈窕勝蛾眉埋玉空山是幾時  
重到園中聽歌舞不成驩樂却成悲

陳郎丰度似何郎長袖蹁躑韻繞梁  
此日重來君不見舞裙歌扇總淒涼

八尺湖夜泊懷李與熙張子環

八尺湖邊月上遲相逢猶記去年時  
一從落魄長安後三處飄零各不知

石門晚泊即事

湖上人家帶暮烟日斜維棹小橋邊  
桑間試問繅絲女此是春蠶第幾眠

寄弟

春風送客翻愁客客路逢春不當春  
寄語鶯聲休便老天涯猶有未歸人

對鏡

前路虛名未可期曉來臨鏡不勝悲  
無情最是雙青鬢

豈待名成始有絲

舟中懷幼孺

春風並轡出都時  
江北江南處處隨  
一自松陵分手後  
幾多山水不題詩

漁梁街逢趙彥宗

匹馬相逢嘆路岐  
匆匆對語不多時  
知君別去無他想  
也是尋思遇我詩

幔亭集卷十三